

errores continent. Incantationibus autem serpentes aliquam Domini Cœnam celebraturi euocant, quam Augustinus in spelunca esse scribit. Irenæus & Epiphanius in cista gestari & ab illis circumferri narrant, quibus potius credo. Ex quo apparet Ophitas, turpissimam πολυθείαν nempe Dei & Serpentis inducere. 2 Error. Panem Cœnæ Domini & Eucharistiæ non prius sanctificatū esse putant quàm serpens ille euocatus lambat & attingat eum siue degustet. Itaque hoc iis euenit, quod damnat Paulus I. Corinth. 10. vers. 21. ut mensæ Domini & mensæ Demoniorū fieri velint participes. 3 Christum verè hominem factum esse negant, id quod illis cum superioribus hæreticis commune est. 4 Carnis etiam resurrectionem irrident, ut scribit Tertullianus.

## CAPVT XVIII.

Caini vnde dicti, erroris autem eorum capita tria.

**C**aini propterea sic 1 appellari, quoniam Cain honorant, dicentes 2 eum fortissimum esse virtutis: simul & Iudam traditorem, diuinum aliquid putant esse, & scelus eius beneficium deputant, asserentes eum præscisse, quantum esset generi humano Christi passio profutura, & occidendum Iudæis propterea tradidisse. Illos etiam, qui schisma facientes in primo populo Dei, terra dehiscente, perierunt, Core, Dathan, & Abiron, & Sodomitas colere perhibentur. Blasphemant Legem, & Deum Legis authorem: Carnisque resurrectionem negant.

I Sic